

NYE POLITIVEDTEKTER FOR KLEPP KOMMUNE 2008

Vedtatt i kommunestyret 11.02.08 sak 3/08

Justisdepartementet stadfestar vedtak av Klepp kommunestyre av 11. februar 2008 om ny politivedtekt for Klepp kommune, Rogaland fylke, jf lov om politiet av 04.08.95 nr 53 § 14.

Vedtekta lyder:

Kapittel I Allmenne føresegner

§ 1. Offentleg stand

Med offentlig stad er i denne vedtekta meint gate, veg, her medrekna fortau, sti, park, torg el, plass, bru, bryggje, kai, strand, anlegg eller annan stad der det er allmenn ferdsel eller som er bestemt for allmenn ferdsel.

§ 2. Festar, brukar, leigar eller styrar av hus eller grunn

Plikter som eigar av hus eller grunn har etter denne vedtekta, gjeld og for festar, brukar, leigar og styrar av hus eller grunn.

Kapittel II Orden på offentlig stad

§ 3. Ro og orden på offentlig stad

På eller attmed offentlig stad må ingen vera med i oppstyr eller samanstimling, larm eller bråk som uroar den allmenne orden eller ferdsla.

Når mange menneske samlar seg nær inngang til forsamlingslokale, sports plass, utsalsstad, stoppestad el, skal dei stå i kø og elles rette seg etter dei pålegg som politiet eller arrangøren gir for å halde oppe den allmenne orden, eller for å regulere ferdsla.

§ 4. Song og musikk, reklame mm

Den som på eller ut mot offentlig stad vil føre fram song eller musikk, skipa til framsyning eller gjere bruk av høgtalar, må på førehand gje melding til politiet.

Det same gjeld den som på eller nær offentlig stad ynskjer å dele ut eller spreie opprop, lysingar, reklame el, eller bruke gåande, kjørande eller flygande reklame.

§ 5. Farleg eller skremmande verksemd

På, utover eller like attmed offentlig stad er det forbode:

1. Å skyte med gevær eller anna skytevåpen, eller med boge, sprettert el.
2. Å brenne av krut, fyrverk eller sprengstoff utan at politiet har gitt løyve.
3. Å kaste eller sleppe stein, snøball eller anna som kan vere til skade eller ulempe for dei som ferdast der.

Kapittel III Sikring av ferdsla

§ 6. Hindringar

På eller ut over offentleg stad er det forbode å setje eller hengje noko som kan vere hinder eller ulempe for ferdsla.

Markiser skal vere festa så høgt at underkanten er minst 2,50 m over bakken.

§ 7. Sport, leik

Politiet kan setje forbod mot aking og andre former for sport, leik eller spel på bestemt offentleg stad der dette er påkravd av omsyn til ferdsla eller den allmenne orden.

§ 8. Sperring av fortau mv

Krev byggjearbeid el at gate, veg eller annan offentleg stad vert heilt eller delvis sperra for ei avgrensa tid, lyt ein på førehand søkje løyve frå politiet. Politiet kan setje nærare vilkår for løyvet.

§ 9. Sprengingsarbeid

Sprengningsarbeid på eller like ved offentleg stad skal meldast til politiet på førehand. Politiet kan krevje særlege tryggingstiltak.

§ 10. Diveres arbeid

Reising, riving eller reparasjon av bygning, graving eller anna arbeid på eller ut mot offentleg stad der det kan bli fare for ferdselen, skal meldast til politiet på førehand. Politiet kan fastsetja korleis arbeidsstaden skal sperrast, og krevje andre tryggingstiltak til vern for publikum.

§ 11. Vedlikehald av bygning mv

Ved vedlikehald av bygningar mv på eller ut mot offentleg stad, pliktar den ansvarlege for arbeidet å setje opp avvisarar som gjer det tydeleg at det er farleg eller til ulempe å ferdast der.

§ 12. Avvisarar

Når det er fare for at snø eller is kan falle ned frå hustak mot offentleg stad, skal eigaren straks setje opp avvisarar som gjer det tydelig at det er farleg å ferdast der, og snarast syte for at taket blir rydda.

§ 13. Fjerning av sperrar

Sperringar, avvisarar, stigar el må takast bort når arbeid som nemt i §§ 8, 9 og 10 er gjort, eller når faren eller ulempen som er nemnt i §12 ikkje lenger er til stades.

§ 14. Ferdsl på frose vatn

Politiet kan av tryggingssgrunnar setje forbod mot eller gje regulerande føresegner for ferdsla på vatn som er frose.

Kapittel IV Reinhald på offentleg stad

§ 15. Takras

Eigar av hus eller grunn mot offentleg stad pliktar å rydde fortauet utanfor eigedommen for snø og is etter snøfall og takras.

§ 16. Avløp for vatn

Eigar av hus eller grunn mot offentleg stad skal sørgje for at avløpet for vatn i fortau, rennestein, grøft el vert halde ope.

Kapittel V Hindre tilgrising

§ 17. Hindre tilgrising ol

På, utover eller like attmed offentleg stad er det forbode:

1. Å kaste glas, plast, flasker, spikar, papir, fruktskal, tyggegummi eller anna avfall.
2. Å grise til med måling, tusj, sprayprodukt el på overflate mot offentleg stad, under dette på eller ved bygning, gate, veg, park, anlegg, innretningar og framkomstmidlar.
3. Å henge opp kunngjeringar, plakatar, el utan at politiet har tillete dette.

Dette gjeld likevel ikkje oppslag på tavler el som kommunen har godkjent til slikt bruk, oppslag som bare høyrer eigedommen til, eller næringsverksemda til dei som bur der.

Det er forbode å rive, skade eller skjemme oppslag som er lovleg sett opp.

Oppslag skal fjernast når dei er forelda.

4. Å uriner eller spytte.
5. Folk som ferdast langs tursti eller gang- og sykkelveg med dyr, har plikt til å fjerne møkk som dyra let etter seg.

§ 18. Avfall

Den som driv med sal frå portrom, kiosk el, eller som driv anna liknande næringsverksemd på eller ut mot offentleg stad, skal syte for at området ikkje vert skjemt eller skitna til av verksemda, og pliktar å syte for at det blir sett opp mange nok korgar for papir og avfall.

Den som arrangerer tilstelling på offentleg stad, skal syte for at papir og anna avfall blir fjerna etter arrangementet.

Kapittel VI Arrangement på offentleg stad mm

§ 19. Søknadsplikt for arrangement på offentleg stad

Den som på offentleg stad vil lage til arrangement som hovudsakleg er av underhaldande, kunstnerisk, selskapleg eller kommersielt slag, som har ein storleik som openbert vil føre til behov for omfattande reguleringar av ferdsla eller vakthaldet, må søkje om dette innan ein frist som politiet set. Politilova § 11 gjeld tilsvarande.

§ 20. Meldeplikt for allment tilgjengeleg arrangement utanfor offentleg stad mm

Den som vil lage til eit arrangement som er allment tilgjengeleg, må sende melding i god tid til politiet. Dette skal gjerast sjølv om arrangementet ikkje går føre seg på offentleg stad, når det er truleg at det vert naudsynt med polititilsyn for å sikre ro og orden eller avvikling av trafikken på grunn av storleiken på eller karakteren av arrangementet. Plikt til å melde frå gjeld og samkome med dans eller underhaldande art for medlemmer av ei forening eller liknande samanslutning. Politilova §11 gjeld tilsvarande.

§ 21. Meldeplikt for innsamling frå offentleg stad

Personar, lag og organisasjonar skal ved innsamling på offentleg stad gje melding til politiet på førehand.

Kapittel VII Barn

§ 22. Offentleg dans ol

Barn under 15 år har ikkje tilgjenge til offentlig dans eller liknande allmenn tilgjengeleg tilstelling utan at dei er i følgje med foreldre eller andre føresette. Ved arrangement retta inn mot yngre grupper, kan politiet gi dispensasjon frå denne aldersgrensa.

Kapittel VIII Ymse føresegner

§ 23. Forsøming av plikt

Forsømer nokon å utføre det vedkomande har plikt til etter vedtektene eller etter pålegg gitt med heimel i vedtektene, kan politiet på vegne av vedkomande setje dette i verk. Den som har forsømt pliktene må dekke utgiftene.

§ 24. Straff

Brot på føresegner gitt i medhald av politilova § 14, vert straffa etter same lov § 30 nr 4, om ikkje tilhøvet kjem inn under strengare straffepåbod.

§ 25. Iverksetjing

Denne vedtekta tek til å gjelde ein månad etter at ho er stadfesta av Justis- og politidepartementet.

Frå same tid fell politivedtekta for Klepp kommune, stadfesta 24. november 1998.